

Na osnovu člana 3. Sporazuma između Vijeća ministara Bosne i Hercegovine i Vlade Republike Slovenije o saradnji u oblasti kulture, obrazovanja i nauke („Službeni glasnik BiH“, broj 1/2001) i Protokola desetog zasjedanja Zajedničkog odbora za naučnu i tehnološku saradnju između Bosne i Hercegovine i Republike Slovenije, održanog putem elektronske prepiske u decembru 2013, Ministarstvo civilnih poslova BiH, objavljuje

K o n k u r s

za sufinansiranje boravaka i putovanja u okviru saradnje istraživača koji rade na realizaciji zajedničkih naučnoistraživačkih projekata u okviru naučne i tehnološke saradnje između Bosne i Hercegovine i Republike Slovenije za 2016. i 2017. godinu

Predmet konkursa

Predmet konkursa je sufinansiranje (do 14 dana godišnje) međusobnih posjeta (troškovi putovanja i boravka) istraživača iz BiH i istraživača iz Republike Slovenije, koji će izvoditi zajedničke istraživačke projekte (u daljem tekstu: bilateralne projekte) u 2016. i 2017. godini.

Slovenačka strana će za bosanskohercegovačke mlade istraživače za dodatno odobrene duže posjete u Republici Sloveniji (od 1 do 3 mjeseca) pored boravka sufinansirati i putne troškove.

Kriteriji za odabir projekata

Kriteriji za odabir projekata za sufinansiranje su:

- a) značaj rezultata istraživanja za ekonomski i društveni razvoj Bosne i Hercegovine,
- b) naučna vrijednost i/ili primjenjivost istraživanja,
- c) potencijalna mogućnost za uključivanje u istraživačke projekte EU,
- d) upotrebljivost rezultata istraživanja u praksi, odnosno u ekonomiji zemlje,
- e) reference istraživačke grupe,
- f) uključivanje mladih istraživača,
- g) izvodljivost projekta.

Prednost pri izboru projekta imat će projekti koji imaju mlade istraživače i podršku partnera iz privrede.

Sve projektne aplikacije koje podnose aplikanti iz Bosne i Hercegovine moraju ispunjavati opće i posebne uvjete odredbi pravilnika/kriterija o sufinansiranju naučno-istraživačkih projekata koje primjenjuju Federalno ministarstvo obrazovanja i nauke (za aplikante s područja Federacije Bosne i Hercegovine) i Ministarstvo nauke i tehnologije Republike Srpske (za aplikante s područja Republike Srpske), a na bazi kojih će biti vršeno i vrednovanje podnesenih projekata.

Vrijeme izvođenja zajedničkih projekata

Vrijeme izvođenja zajedničkih projekata je dvije godine.
Predviđeni termin početka rada na projektima je 1. januar 2016. godine.

Prijava na konkurs

Prijava na konkurs se podnosi Ministarstvu civilnih poslova Bosne i Hercegovine, putem entitetskih ministarstava nadležnih za nauku (Federalno ministarstvo obrazovanja i nauke, Ministarstvo nauke i tehnologije Republike Srpske).

Prijava za konkurs treba da sadrži sljedeće elemente:

- a) Naziv projekta,
- b) Podatke o instituciji koja predlaže projekat,
- c) Podatke o glavnim istraživačima na projektu iz Bosne i Hercegovine i iz Republike Slovenije sa njihovim najznačajnijim publikacijama koje se odnose na sadržaj projekta, a objavljene su u posljednjih 5 godina,
- d) Detaljan opis projekta sa očekivanim rezultatima,
- e) Plan razmjene posjeta bosanskohercegovačkih i slovenačkih istraživača za svaku godinu projekta.

Prijave projekata na konkurs podnose se na obrascima koji se mogu preuzeti sa web stranice Ministarstva civilnih poslova Bosne i Hercegovine www.mcp.gov.ba (link konkursi), odnosno na web stranicama entitetskih ministarstava nauke www.fmon.gov.ba i www.vladars.net.

Istraživači iz Bosne i Hercegovine za učešće u zajedničkim projektima treba da obezbijede i pisanu saglasnost slovenačkog partnera na aplikacionom obrascu.

Glavni istraživač u ime bosanskohercegovačke strane mora biti državljanin Bosne i Hercegovine sa prebivalištem u Bosni i Hercegovini i zaposlenjem na nekoj od institucija koja se bavi naučnoistraživačkim radom.

Prijava na konkurs mora stići do **15. juna 2015. godine** do 10.00 sati u prostorije Federalnog ministarstva obrazovanja i nauke, dr. Ante Starčevića bb, 88 0000 Mostar (za aplikante sa područja Federacije Bosne i Hercegovine) ili Ministarstva nauke i tehnologije Republike Srpske, Trg Republike Srpske 1, 78 000 Banja Luka (za aplikante sa područja Republike Srpske) s naznakom „Prijava za sufinansiranje boravaka i putovanja u okviru saradnje istraživača koji rade na realizaciji zajedničkih naučnoistraživačkih projekata u okviru naučne i tehnološke saradnje između Bosne i Hercegovine i Republike Slovenije za 2016. i 2017. godinu“.

Partneri iz Slovenije prijavu predaju u Republici Sloveniji za Javnu agenciju za istraživanje, do **15. juna 2015. godine** do 12.00 sati.

Zajednička komisija Ministarstva civilnih poslova Bosne i Hercegovine, Federalnog ministarstva obrazovanja i nauke i Ministarstva nauke i tehnologije Republike Srpske razmotrit će pristigle prijave i izvršiti odabir projekata koje će predložiti Zajedničkom odboru za sufinansiranje.

Zajednički odbor za naučnotehnološku saradnju između Bosne i Hercegovine i Republike Slovenije izvršit će izbor projekata i obim razmjena u okviru kojih će se sufinansirati boravci i putovanja istraživača i njihova saradnja, a na bazi dostavljenih projektnih aplikacija na ovaj konkurs, o čemu će aplikanti biti obavješteni u zadnjem kvartalu 2015. godine.

Entitetska ministarstva nadležna za nauku će pripremiti i na svojim službenim internetskim stranicama objaviti interne procedure i obrasce zahtjeva za dodjelu sredstava po odobrenim projektima i izvještaja o realizaciji projektnih aktivnosti.